

لسانلر اولککلره ده گیل ملتله نسبت اولونور . شمالی آمریقاده قونوشولان لسانه « آمریقاجه » دینلمز « انکلیرجه » دینیر .

« عثمانلی » دییه برملیت قبول اولونمايجه « عثمانلیجه » دییه برلسانده قبول اولونماز .

شأنیتک ، علمک بووضوخنه رغماً :

— بولسان عثمانلیجه در ...

دیمکده عناد ایدهنلر کیملردر ؟

دولت و ملتک آیری آیری شیلر اولدیغنه عقل ایردیره مینلر ، اُسکی و قرون وسطائی مدرسه علومنده حقیقت آرایانلر ، فنه افسانه نظریله باقانلر و برده تورک ملتک اجتماعی و تربیه وی وحدتی چکمه مینلردر . اولکیلر جاهل ، فقط صوکنجیلر عالمدرلر . نه یاپدقلرینی بیلیرلر . مقصدلری تورک ملتنی انکار ایتمکدر . بونک ایچون اولا لسانی انکار ایدرلر و تورک دیلنی : « عثمانلیجه ، چاغتايجه ، آذربایجانجه ، قاراباججه ، اوزبکجه ، قیرغیزجه ، شماجه ، جنوبجه ، قریمجه ، تاتارججه » گیبی پارچاره آیریرلر . حالبوکه بونلر آیری برلسان ده گیل ، برر لهجه در . و هپسی تورکجه در . هله روس عالملی راحتجه یوتمق ایچین تاتارلری لسانجه تورکلکدن آیرمغه صوک درجه چالیشیرلر .

ملتک لسانله قائم اولدیغنی بیلن ملتپرور گنجلر تورک ملتنی داغیتیق و برله شیرمه مک ایچین یاییلان بو یا گیش و فنه مخالف تقسیم قبول ایتمزلر . « لسانیات » علمنجه « تورکجه » برلساندر . یالکیز مختلف لهجه لری واردر . و استانبول تورکجه سی بوتون تورکلرک ادبی لسانیدر .

قونوشولان صاف ، ساده ، گوزهل و قوتلی استانبول تورکجه سیله دوغاجق اولان ملی بر تورک ادبیاتی ، ملی بر حرث Culture nationale داغیتیق و پریشان قالان

بویوک برملتک اجتماعی برلگنی تأمین ایده جک ، سکان میلیون قارده شمزی معاصرلاشدیرا جقدر . فقط بوقادار مقدس و بویوک غایه یه آنجاق جانلی و طبعی برلسانله گیدیله بیلیر . اوده ، دائماً تکرار ایدیورز ، اوقادار سودیگمز ، قونوشورکن محظوظ اولدیغمز لطیف و آهنگلی استانبول تورکجه سیدر .

عمر سیف الدین

تربیه ایشلری

خیبر قلعه لرینک ، بطل غازیلرک

تربیوی خدمتلری

اوقویو جیلرمدن کیمی « شاقمی ایدیور ؟ » دیه قهقهه لر صالیورده جک ، کیمی « آدام ، بوتورکچیلر باقلم داها نلر یومورطلايه جقلر ! » دیه آلاي ایده جک ، کیمی ده « وای باشمک قارا یازبسی ، یگرمنجی عصرده خیبر قلعه لرندن ، بطل غازیلردن تربیوی خدمتلر اومان یازیجیلریمزده وار ! » دیه دوگونه جک . ضرری یوق ، بن بونلرک هپسنه قاتلانجه جم ، دوشوندیکم شیلری آجیق آجیق یازاجم ، « خیبر قلعه لری » نه ، « قان قلعه لری » نه ، « بطل غازیلر » . احتیاج جز اولدیغنی آکلاتمغه چالیشاجم ، و نهایتده بویوک بر جسارتله اورتایه ایشیدیلهدک بر ادعا فیرلاته جم . اوقویو جیلریم ایچنده عجم دوزمه سی دیه « جاوالا جوستا » شیلردن صایدقلری « خیبر قلعه سی » نی ، « بطل غازی » نی چوجوققلرلنده سوه سوه اوقوماش قاچ کیشی واردر ، عجبا ؟ یگنی نسلی بیلیمورم اما ، بزم نسل ایچنده بو ، کوتو برضاری کاغد اوزرینه طاش باصمه سیله باصیلیمش کتابلری اوقوماش اولانلر یك ، یك آز اولسه گرکدر .

بن ، شیمدی ، کندی چوجوققلغمی خاطر لادم ؛ هنوز رشدیهنک ایلک سنه لرندو آنجاق اوقور یازار برشا کرد